


Apertura hofi literario na Pos Chiquito

Un hofi unda inspiracion y creatividad ta palpabel



ORANJESTAD (AAN) - Diasabra nochi a tuma lugar na Scol di Idioma Yolanda

Croes, apertura di e tan spera "Hofi Literario"; un hofi unda inspiracion y creatividad a reina na un forma pal-

pabel e anochi aki. No solamente e Hofi, pero ful e espacio grandi bou garashi y parti



di e scol tabata yen yen di amante di literatura y poesia. Invitadonan special pa e anochi aki tabata sr. Gaby Mercera di Boneiro y mama di Yolanda Croes, sra. Avelina Croës-Vrolijk, na kende Yolanda a dedica su "Hofi Literario". Gaby Mercera a duna les mainta na e grupo di estudiante di "Papiamento Creativo" na Scol di Idioma y e anochi, ey cada un di nan a recita nan poema ritmico. Pa e studentenan tabata un experiencia nobo den cual nan a descubri talentonan scondi den nan mes. Tabata un exito rotundo y e audiencia a gosa di un anochi sumamente placentero, educativo y cultural. Tambe sr Mercera a duna splicacion di e gran escala di instrumento cu e mes a traha di cual algun ta su propio creacion. Esaki e artista Boneriano a haci na un forma humoristico, poniendo e sala hari mientras nan tabata wordo educa. No solamente aficionadonan di literatura tabata presente, sino tambe autornan di buki, poetanan renombra manera Olga Buckley y Gwendy Sneek kendenan a declama nan poesianan e anochi aki. E conocido y flamante Ruthy Vrieswijk a presenta un poesia cu el a dedica specialmente na e Hofi Literario y na su iniciador Yolanda Croes. E conocido 'Tante Dora' di e revista infantil "Chabalito" y mama di un di nos studentenan di 'Papiamento Creativo', sra. Dora Lauffer, a declama dos di su poemanan na final di e anochi. Ambiente musical tabata den man di Yolanda y su grupo "E Motibo", un banda di famia, cu ta toca y canta canticanan bieu di

antes. E anochi aki a honra nos cu nan presencia sr. Stanley Dabian di Departamento di Cultura, sra. Josmar Sneek di Biblioteca Nacional, Parlamentarionan Arthur Douwers y Mike de Meza y ex-presidente di Staten sr. Eddy Croes y nan respectivo esposa. Na sr. Mike de Meza a bay un mencion special ya cu sr. de Meza a demostra di ta un persona cu tin literatura y educacion di nos hobennan na pecho patronisando na inicio di e aña aki, bukinan di Yolanda Croes na biblioteca-canan di tur e scolnan Mavo, Havo, Avondleergangen na San Nicolas y tambe na cas di anciano Maristella. Henter e anochi tabata den man di sra. Desiree Correa, autor di buki, docente di idioma y tremendo presentador y animador cu su manera chistoso di brei henter un anochi asina na otro. Un danki di curason ta bai na tur cu a tuma nan tempo y a honra nos cu nan presencia. Danki tambe pa boso palabranan di elogio, boso animacion y empuhe pa e iniciativa y pa sigui cu e proyecto. Keda pendiente pa nos proximo encuentro na nos "Hofi Literario", cu mi ta spera lo bira pa hopi di nos un segundo 'hogar', asina Yolanda Croes a duna di conoce. Por ultimo Yolanda kier a manda un danki grandi na su cuña Adelita, su yiunan y suegrosnan Maruschka, Sacha, Garrick y Sasha. "Si no ta pa nan hamas lo nos por a realisa e Hofi Literario. Nan a mula e dianan aki; drecha coriente, pega lus, planta mata, colga tela y hala pochi mata p'aki p'aya pa crea e hofi. Un biaha mas danki!" asina Yolanda Croes a declara.